

撫夏奏議書



撫夏奏議卷之五目錄

一議覆邊務疏

一敘叅營堡各官經理馬匹椿朋疏

一催補河東道疏

一獲功報捷疏

一敘議各官功罪疏

一報慶藩火災疏

一方面九年考滿疏

一甄別練兵官員疏

一年終議薦將材疏



一報小池撈鹽分數疏

一虜犯石空查叅失事將領疏

一調補副將疏

一請補該道疏

撫夏奏議卷之五

議覆邊務疏

奏為欽奉

聖諭事准總督陝西二邊軍務兼理糧餉太子少保
兵部尚書兼都察院右副都御史徐三畏咨准
兵部咨職方清吏司案呈奉本部送萬曆三十
六年三月二十五日該司禮監太監成敬等於

文華殿傳奉

聖諭朕雖靜攝宮中心未嘗不念周天下其於柔遠
安邇詰戎振武之事尤惓惓焉昨見滇夷作孽樸

滅非難何至日久蔓延任其焚劫失郡失邑戕官
殺民如入無人之境撫鎮官平居防守何為臨事
制禦何策陳用賓沐叡都著住了俸戴罪殺賊自
贖如縱寇遺患併治不貸其保身失事為國死事
官員了無分別奚以激勵人心著巡按御史作速
勘來處分又粵地遠在萬里狡夷竊發果否遁逃
作何防剿失事地方作何保禦著撫按也從實勘
報其遼東建酋不思國恩不遵貢典招亡納叛意
欲何為地切

陵京豈容如此怠忽該督撫鎮巡等官務要申飭軍
令嚴戒將領毋習故役剋以失軍心毋自弛威嚴
以生戎心若有疎虞責有所歸尠該部即便馬上
行文與他每知道前余懋衡閱視條奏邊事業已
有

旨未見奉行具奏仍還傳諭各邊守臣一體振刷以
稱朕意故諭欽此恭捧到部備咨到臣卷查本年
二月十七日准總督軍門咨為閱視事竣敬陳
邊防要務以佐安攘事准兵部咨該巡按陝西
監察御史余懋衡題前事本部覆奉

欽依合咨前去煩照題奉

欽依事理轉行該鎮巡撫衙門一體欽遵查照施行
等因備咨到臣隨即移文寧夏總兵官蕭如薰
及案行河西河東二道轉行大小文武將吏各
一一欽遵見在舉行今莊誦

聖諭仰見

皇上宵旰時塵於

九重慮念常周於四海頃緣一二地方有警通

勅各邊守臣一體振刷

聖謨弘遠真為安夏攘夷之要臣謬叨邊寄敢不竭
蹶祇遵以仰慰

聖懷除一面復行各官著實奉行外臣謹會同總督
陝西三邊軍務兼理糧餉太子少保兵部尚書
兼都察院右副都御史徐三畏看得陝西按臣
余懋衡條議十事皆為籌邊之至計亦皆為各
邊之當行矧寧鎮以孤懸之地當彫劫之秋內
之元氣猶虛外之夷氛尚惡乘此徹桑尤為已
晚而敢泄泄懈弛遺

皇上西顧之慮耶夫析十事而分言雖意各有殊約
十事而力行總不外一實蓋事事務實則籌邊
無餘策矣事事覈實則馭吏無餘方矣如按臣

所謂務臻實效無事虛文者是也而臣等不敢
不勉圖之也為此謹將遵行緣由照款開列理
合具本專差承差陳用齋捧謹具奏

聞奉

聖旨兵部知道

計開

一積錢糧

前件臣等看得閱視按臣余懋衡所議積
錢糧一款深究不足之故而於出入兩
途尤諄諄致意焉誠籌邊裕國之遠猷

也豈獨延鎮所當舉行哉寧鎮錢糧三
十三年終較之三十年終雖稍稱有餘
然西鳳平慶等府民運之拖欠則二十
九萬三千零矣小鹽池鹽價之拖欠則
二萬二千零矣淮鹽浮引之盛行則鹽
商斗頭日以減削矣此在平時已自難
支萬一地方有警寧不為之寒心哉除
鹽法已經戶部題覆疏通及小鹽池近
該臣等具

題添井增夫可望漸次充足外其拖欠之多者無

如民運臣等已照按臣所議檄行布政司嚴查在州縣者責以分限比徵毋憑奸胥而滋混冒在衛所者責以逐年清楚毋同積識以恣侵漁苟其催徵無法起解不前則又必照例叅處庶人心儆惕而邊儲可少接濟矣夫入之之途既闕則出之之途亦不容不嚴所謂虛數之耗軍儲專司之開弊竇則臣等亦何敢泄泄然而不力為之振刷也俟有積餘據實造冊以候下次閱查理合

奏報

一 修險隘

前件臣等看得閱視按臣余懋衡所議修舉者延鎮之險隘詳哉其言之矣然寧鎮與延鎮壤地相接自花馬池以西至安定堡延袤二百里其為沙泮與延鎮之定邊無異平虜以西其為水口亦多有之則修築之法亦豈有異焉查得鎮城中衛平虜靈州花馬池興武清水橫城安定城堡俱係磚包惠安鐵柱泉二

堡近亦包完紅山鹽池等堡見今查議包修其餘土堡尚多而時難舉盈不得不次第圖之唯是沙湃一帶最稱衝險近該臣等酌量地形修築磚石空心敵臺四座高連女牆五丈五尺底闊二十丈頂闊一十八丈每座可容軍五百名據險防守似足以備不虞其水口處所如鎮朔之歸德汝箕洪廣之黃硤宿鬼廣武之三山石溝玉泉之青羊金塔等處向來雖用石築而衝突易壞每費工力臣等已照按臣所議通行各路將領各壘石口從闊從高從實地起兩邊俱用石堵口上編架松木以作牆腳從上累石高至四尺而後築土其水口大者酌量水勢多開數口仍復量高數尺以防衝突俟修完之日據實造冊以候下次閱查理合

奏報

一練兵馬

前件臣等看得閱視按臣余懋衡所議練

兵馬一款因練兵而推及於選將誠返本窮源之論也寧鎮兵馬既同則選將練兵豈容有異除守備以上聽兵部推用外其中軍千把總及操守等官容臣等咨訪道府等官先之以年貌試之以弓矢考之以素行一一從公選用務在得人至於練兵之法應如按臣所議革其虛冒汰其老弱擇弓矢之精者以教各隊之弓矢火器之精者以教各隊之火器刀劍戈矛亦復如是仍須常常比試分別勸懲如所教人數之中賞者多則教師併賞責者多則教師併責而該管把總亦視此以為優劣務使技藝稱良膽氣倍壯以此當敵方克有濟而臨陣之際則又明其賞罰先登者賞亡軀者恤逗遛者罰奔北者誅庶乎兵將一心紀律不易常守此法可無憂醜虜矣若夫軍丁食糧原有豐約墩軍遠近原自更番無容再議外俟訓練精日據實造冊以候下次閱查理合

撫夏奏議
卷五
奏報

一整器械

前件臣等看得閱視按臣余懋衡所議整器械一款大率謂軍中器械不止火器而火器為中國之長技其在禦虜尤為切要顧火器亦不一矣而切於用者無如滅虜湧珠及三眼槍云按臣於閱試之時親驗利鈍而深究其制作之原欲改三眼為一眼筒深子多可以及遠誠為便利之器而軍中之所必資者百子銃臣嘉善嘗倣遼東之式造於大同試之而驗近復造之寧鎮分發正兵營三十位竒遊二營各二十位其用架活法悉與按臣議同東西俯仰隨手可使唯是體質頗小尚不能如遼鎮者之得法容臣等再移文該鎮查取一件為式併前一眼槍多行製造以備防禦而又嚴粗惡之禁於監造之官慎繡鈍之防於看守之役而藥料則責成於司庫之員役焉但有苦窳敗壞必繩以法庶器械

其得用乎俟造完之日據實造冊以候
下次閱查理合

奏報

一開屯田

前件臣等看得閱視被臣余懋衡所議屯
田蓋躬歷邊垂目覩夾道地土荒蕪慨
然為二難一畏之說其於屯政不啻燭
照而數計之矣寧鎮雖無夾道而額設
屯田為河衝者有焉為沙壓者有焉河
衝沙壓軍亦逃亡為人田兩無者亦有
焉奈之何額供不日縮也查近年以來
雖已開墾三百四十餘頃然而未開者
尚多也深究其弊母乃亦二難一畏之
未盡除乎臣等已照按臣所議督行屯
田及管糧管屯府衛各官務令勤其勸
相禁其科索寬其催徵凡近堡五里內
地拋荒未久者設法召種量減舊額徵
糧其遠堡五里外地拋荒年久者聽民耕
種給帖勒石永不起科務使民皆樂趨
而軍儲有賴臣等不敢不力行之俟開

禮完日據實造冊以候下次閱查理合

奏報

一理鹽法

前件臣等看得閱視按臣余懋衡所議理鹽法一款條陳五弊鑿鑿乎其言之也除浮引之當停私鹽之當禁已該戶部題覆疏通申飭外其復開墾禁賄買融派中則寧鎮所宜亟行焉何也開墾不復則收穫之利猶微賄買不禁則粗惡之防猶疎派中不融則豐歉之時無辨

應如按臣所議自衛所屯田外但有閑曠地土可以耕種者准令各鹽商盡力開墾給以執照永不起科而塞下之粟必多矣徵糧之日務令管糧官親詣倉口督率官吏查照原派色樣驗收入廩毋以燕麥而抵小麥毋以羨米而抵正米違者必懲而倉中之儲必良矣派鹽之日毋拘定額容臣等通行各道酌量豐歉通融裒益如歲豐穀賤則多請召中無拘當年之引目歲歉穀貴則存留

少中以俟豐年之召補則引既不滯額亦不虧而各商之苦亦庶乎其少廖矣俟行有次第據實造冊以候下次閱查理合

奏報

一收胡馬

前件臣等看得閱視按臣余懋衡所議收胡馬一款推原耗馬之由而於養馬之無實也貢馬之太濫也尤致詳焉可謂切中時弊矣此弊不革則在野無雲錦

之群隨營皆虺虺之騎即有精兵良卒能以當虜之震蕩衝突哉臣等已行該道嚴督各營將領及撫夷等官凡遇貢馬之日必詳加查驗可收則納之不必太苛以失羈縻之意不可收則謝之毋徒曲徇以長驕嫚之心此臣等之所當堅持者也若既給軍之後則又必時其料草而該管千把總日稽查之驗其膳分而該管道將月賞罰之戕之以避征者誅弃之以餌賊者罰圍獵而斃虜擄

盜竊而失者償非軍器不用之以馱載
非軍務不用之以馳驅則茶馬胡馬悉
皆可用而營務之充實有日矣此臣等
之所當申飭者也俟收有次第據實造
冊以候下次閱查理合

奏報

一散逆黨

前件臣等看得閱視按臣余懋衡所議散
逆黨一款察其情形限其名數蓋遠鑒
晉室雲擾之轍近懷

國家隱伏之憂思深慮遠徹土苞桑此誠今日對
證之劑也其在寧鎮則漢夷有收而其
願回原籍者不强留之充丁也真夷有
收而非帶有室家者不濫給之糧餉也
況邇年和款以來例不收降其充丁食
糧者不過三百餘名以之鄉導以之衝
鋒既可以收其精銳之用而老死不補
黨與未繁亦可以消其颺去之思蓋昔
之散逆也以收之之說為散也今之收
降也以散之之說為收也蓋非收則無

以孤虜今日之勢非散亦無以杜我異日之憂按臣於各鎮收降限以四十名寓散於收其策之兩得者乎至於出境有詰而母容漢人之逃逸入境有詰母令奸細之潛留則臣等與各道將敢不兢兢日為之防也俟散有次第據實造冊以候下次閱查理合

奏報

一酌撫賞

前件臣等看得閱視按臣余懋衡所議酌撫賞一款大都謂夷欲難厭撫賞難徇革除轉堡要在自強此誠制款之第一義也查寧鎮原無轉堡之賞自二十九
年續款

題定市賞銀四萬一千二百兩每歲聽部解發並不累及軍士唯是本鎮款虜以東則有若若黃婦火落赤等矣以西以北則有若賓妻着宰等矣若銀定則向來未款而互成則款與未款之間者也恭順如黃婦諸酋則臣等各照例給賞以示之勸

跳梁如銀万二酉則臣等亦各照例革
賞以示之懲盖款市唯藉以羈縻原不
以此為重輕故來則市而不來則不市
市則賞而不市則不賞總之順者用撫
而不必挑釁為兵端逆者用剿而不得
縱敵遺邊患按臣所謂款不忘戰戰以
維款者其以是乎至於所為自強之術
如峙糧糗以備緩急整兵馬以防侵軼
禁將領以杜曲徇俱應亟亟舉行則庶
乎因款修備而不至為虜之所愚矣俟
撫有次第據實造冊以候下次閱查理
合

奏報

一定經制

前件臣等看得閱視按臣余懋衡所議定
經制一款娓娓千言洞悉諸弊矣盖謂
諸弊除而後經制可定也其在寧鎮十
九年

題定之經制非不犁然具也乃年久法弛則諸弊
亦漸滋矣而倉庫為尤甚臣等嘗議改

監收立法查覈雖亦漸覺清楚然未敢
謂弊端之盡釐也應如按臣所議嚴行
該道加意剔除於軍則除軍之弊而不
得以役占妨操備不得以虛冒潤囊橐
而故違者必究於官則除官之弊而不
得以闌葺滋糜費不得以贅疣遺騷擾
而可省者必裁於倉庫則除倉庫之弊
而不得以踈縱養狐鼠不得以出納忽
錙銖而有犯者必懲諸弊既除經制自
定無論目前之濫觴可杜即以復十九
年之舊額亦何不可哉俟經制定有次
第據實造冊以候下次閱查理合

奏報

敘叅營堡各官經理馬匹椿朋疏

題為乘時治安整飭兵馬以壯邊疆事准總督陝西三邊軍務兼理糧餉太子少保兵部尚書兼都察院右副都御史徐三畏會稿准巡撫寧夏兵部右侍郎黃嘉善咨據寧夏河西河東二道各呈造本鎮營堡衛所萬曆三十五年分馬匹椿朋屯田銀兩數目并應免應薦將罰治官員職名冊由各到職查得萬曆三十四年終本鎮舊管馬一萬二百三十六匹三十五年新收買補并給領茶牧馬二千四百四十匹開除倒死

并變價馬九百八匹實在馬一萬一千七百六十八匹比三十四年多馬一千五百三十二匹萬曆三十四年終舊管廣裕庫收貯椿朋屯田等銀六百四十兩四錢零三十五年新收椿朋屯田馬匹變價等銀五千二百九十二兩八錢零開除支放買馬等銀一百五十二兩三錢零實在廣裕庫收貯銀五千七百八十一兩零比三十四年多積銀五千一百四十兩六錢零拖欠未完銀二百六十一兩零等因又准巡撫陝西兵部右侍郎兼都察院右僉都御史顧其志

巡撫延綏都察院右副都御史涂宗濬各咨報延固二鎮該年馬匹椿朋屯田等銀數目并各應免應薦獎叅罰官員備咨俱到臣卷查先准甘肅撫院會稿准兵部咨內開將該鎮騎操馬匹及椿朋屯田銀兩備查要見原額倒失已未買補各若干不及分數照例住俸若干已及分數免住若干其椿朋屯田銀兩亦要明開原收若干買馬支銷若干見收在庫若干拖欠若干又該前撫臣田樂題議止以上次額數視今次實在查叅如馬死少而椿銀完多者薦獎馬死

多而椿銀完少者叅罰馬死多椿銀即完多亦必叅馬死少椿銀即完少姑免叅其應住廩俸各官間有陞遷及革退不管事以前者免支以後者准開又該臣三畏具

題議將住俸官員追椿及數止許開支住過者不許補支俱經該部覆奉

欽依備咨前來已經通行欽遵等因准此該臣查得馬匹椿朋之查叅唯甘肅為然其延寧固二鎮從來未行查叅法令不一漫無懲創議將二鎮照依甘肅事例各營堡馬匹即以三十四年閱

視實在為舊管自三十五年正月起要見一年之內倒死變價若干買補給領茶牧馬若干未補若干以舊管較比有無增損其椿朋屯田老馬馬駒臟皮等銀亦自三十五年正月起逐一清查要見已收在官貯庫若干作為舊管節年拖欠未完若干立為見徵續入逾年新增其後一年之內完過若干開除若干實在若干每年終令四鎮撫臣查敘明白咨臣類叅等因具

題該兵部依擬覆奉

欽依備咨前來已經通行各撫臣欽遵稽查咨報去

後今准前因會稿到臣除延固二鎮聽該鎮撫
臣具

題外臣謹會同總督陝西三邊軍務兼理糧餉太
子少保兵部尚書兼都察院右副都御史徐三
畏議照寧鎮地當虜衝防禦追逐全藉馬力而
買補馬匹惟賴樁朋向來舉刺不行故各官率
多慢視今一行查叅比之上年則多馬一千五
百匹多銀五千一百四十兩零其裨益於疆場
者不淺也既經各道冊報前來該臣等覆覈無
異相應照例分別以示勸懲除馬匹損失數少

銀兩未完不多及革任叅守等官王大壘等例
免賞罰不開外其馬死少而樁銀完多與無馬
有銀而全完并完及八分以上者如寧夏總兵
官蕭如薰花馬池營先任副總兵今陞陝西總
兵官王邦佐寧夏陞任副總兵姚國忠靈州營
叅將吳繼祖中衛營陞任遊擊于翔儀興武營
遊擊丁繼祖廣武營遊擊江應詔安定堡陞任
守備潘應元石空寺堡陞任守備金成橫城堡
守備戴邦治中軍正兵營原任守備熊彥吉花
馬池營指揮盧養材靈州營千戶王承恩興武

營千戶陳有光廣武營千戶孫崇忠千總正兵
營原任守備黃培忠指揮勉忠奇兵營指揮陳
應武把總正兵營指揮李承爵千戶尹天順張
應元百戶江統奇兵營武舉官石賢百戶鍾鳴
陞劉綬紀應麒標下前司指揮金汝卿後司指
揮江鯤花馬池營指揮馬應龍余之龍百戶江
英靈州營陞任千戶郭維校百戶盧文善張大
綬楊武李芹中衛營千戶劉采馬允祥百戶周
召的興武營千戶宗孔教廣武營百戶毛克忠
安定堡百戶林應禎石空寺堡百戶張書紳橫
城堡百戶高棟清水營百戶王廉操守威鎮堡
指揮楊廷輔紅山堡武舉署所鎮撫盧養麟鐵
柱泉堡千戶余光憲棗園堡指揮雍時泰永興
堡指揮王綬永寧堡指揮葛忠寧夏左屯衛管
屯指揮吳徵中屯衛管屯指揮納尚文中衛管
屯指揮馮繼孝以上五十四員俱例應薦楊聽
候紀錄如遊兵營遊擊潘國振洪廣營陞任遊
擊劉芳聲玉泉營遊擊賀維禎大壩堡守備施
大顯中軍遊兵營指揮徐珩洪廣營百戶苟伏
威玉泉營千戶方震千總正兵營百戶何寬遊

兵營百戶王養廉把總正兵營千戶張琮武舉
官車應龍奇兵營千戶路忠遊兵營千戶包三
略百戶周從武洪廣營百戶李承憲毛卜刺堡
操守千戶陳誥寧夏前衛管屯指揮馬載道平
虜所管屯指揮許登麟以上一十八員俱例應
獎賞其馬死數逾二分追椿又不及數與無馬
有銀而全未完者如紅寺堡操守所鎮撫白可
成石溝營革任操守指揮李統小鹽池營革任
操守百戶張承勳靈州所管屯指揮韓世芳以
上四員俱例應住俸內李統張承勳雖經革任
仍應罰治以警將來者也伏乞

勅下兵部再加查議如果臣等分別不謬將蕭如薰
等紀錄潘國振等獎賞白可成等住俸李統等
量加罰治仍行見任各官將倒失馬匹作速買
補未完椿朋等銀上緊追徵俟完足額方許開
俸其以前住過者不准補支庶勸懲既明而馬
政聿修衝邊少有裨益矣緣係乘時治安整飭
兵馬以壯邊疆事理臣等未敢擅便為此具本
專差承差陳金齋捧謹題請

旨奉

聖旨兵部知道

催補河東道疏

題為衝邊兵道久缺新推未任聞憂乞

賜亟補以重疆圉事據靖邊兵備帶管寧夏河東道
右布政使王愛呈准新陞本道副使朱芹關稱
於本年八月初四日自紹興府起行赴任至嘉
興地方接得家報有父在家病故例應回籍守
制等因到道相應具呈合無題

請另行推補備詳到臣卷查該臣先已牌行該道催
促去後今據前因時督臣員缺臣謹會同巡按
陝西監察御史余懋衡議照寧鎮止原設兩道

一在河東分理靈州興武等處一在河西分理平虜玉泉等處蓋兩河皆屬重地而修防各有專責所關非淺渺也先是兩道併缺為日已久該部以知府朱芹推補河東奉有

俞旨臣等方喜其來而今復以憂報則河東一道虛矣郎中朱化孚先補河西久未得

請而續補李茂春又為山西借留則河西一道又虛矣東西千里彈壓無人兵馬錢穀誰司其事臣等為此廩廩真有目不交睫食不下咽者况今銀歹二酋以革賞蓄憤思欲狂逞苟竦一日之

防恐有四郊之虞而臣嘉善以衰病一身強為楮楮雖髮膚罔惜而伎倆易窮閔閔焉冀該道之共濟殆不啻如農夫之望歲矣所據前缺相應具

題伏乞

勅下吏部速於就近司道擇其精明強幹者推補一員併將原擬朱化孚陞補河西道前疏統祈

檢發俾令剋期前來任事庶邊務克濟而重鎮有攸賴矣緣係衝邊兵道久缺新推未任聞憂乞

賜亟補以重疆圉事理臣等未敢擅便為此具本專

差承差陳完齋捧謹題請

旨奉

聖旨吏部知道

獲功報捷疏

題為狡虜糾衆入犯官兵堵剿獲捷謹先報

聞事本年十月初一日據中衛叅將賀世勳塘報據
巡邊夷人泮彥兒密說銀定自六月間親往河
東吉囊處討兵回來同歹成約了七箇台吉要
在沿邊并新疆槍掠因秋防俱有兵馬未得入
犯今帶領精兵達子二千六百見住山後鹽池
不知犯槍何處等情臣一面飛檄中衛等處收
斂人畜厲兵秣馬標甲以待如有入犯消息務
要奮勇剿殺大獲全勝鄰兵聞警不待調遣星

馳策應一面發署奇兵營事坐營都司馬允登
領兵駐廣武適中等處聽援至本月初七日辰
時據賀世勳塘報初五日午時分虜衆三千入
犯撲至城門撒馬鷓槍本官統兵對敵斬首四
顆奪獲達馬六匹陣亡軍丁三名殺死夜不收
一名重傷軍丁七名輕傷四名射死官馬九匹
回營倒死四匹槍去男婦一十三名口馬驢牛
羊二百四十二匹頭隻各賊於本日戌時仍從
原口出邊去訖等情臣慮賊既近城蹂躪必多
所報槍掠之數恐不止此隨牌行河西道并理
刑同知王三錫嚴查去後十五日據平虜叅將
聶自新塘報據巡邊夷人土卜賴密報有銀定
等首在山後蒲草泉聚結要在二三日內犯槍
玉泉廣武一帶臣即會同總兵官蕭如薰選發
鎮城各營精健官兵責委遊兵營遊擊潘國振
統赴玉泉等處按伏間十八日辰時據鎮城東
南角樓守瞭軍人張興報稱迤南新渠舉放煙
砲從石空寺堡傳來隨該總兵官蕭如薰統領
本營并前後司官丁一千八百餘員名前去策
應臣復遣標下中軍遊擊黃鈇隨營監陣賊因

烽火傳早是日未敢入邊二十二日據坐營都司馬允登等塘報二十日據廣武遊擊江應詔差夜不收王名走報有銀定等達賊二千有餘在於井溝口墩北空清山水地方聚結苗頭犯槍廣武等處本職同正兵營兵馬到彼待戰二十一日午時分前賊由本口入境煙砲傳到當即統兵馳拒賊見我兵截堵一齊吶喊迎敵隨有鎮城遊擊潘國振領兵五百員名廣武遊擊江應詔玉泉遊擊賀維禎各領兵三百員名亦皆馳至合營剿殺就陣斬獲首級二十三顆奪獲坐纛一杆賊見我兵奮勵遂潰亂奔走官軍乘勝追趕直至邊外賊復據險回敵我兵槍砲齊發打死甚衆又斬獲首級六十顆欲再窮追因天色已晚恐有伏兵一同收兵進邊查得各營共斬虜首八十三顆內正兵營六十四顆據通丁王卜刹認有首領恰首級一顆係銀定下好人別蓋恰奇兵營七顆遊兵營六顆廣武營四顆玉泉營二顆併前中衛先斬四顆共八十七顆奪獲戰馬五十四匹夷器四百五十三件及查各營通共陣亡軍丁四名重傷家丁一十

四名輕傷七名射死官馬一十六匹等因到臣
該臣看得銀歹二酋素稱桀驁而又有山後流
虜為之羽翼故西則屢犯甘涼近則竊窺本鎮
為患非一日矣在歹成自前犯鎮朔已經革賞
銀定則又獨自跳梁不受羈縻者也近因要挾
未遂蓄憤思逞或今日借兵某酋或明日聲犯
某路露爪張牙情形久著臣於報災報缺疏中
已屢言之今突犯中衛未遭大創乃敢復犯廣
武幸而我兵預布一戰而斬虜首八十餘顆雖
未殲厥渠魁而敵加我應彼逆我剿亦足以寒
外夷之膽而伸

中國之威矣今二酋猶結兵未散除臣嚴檄各該
將領萬分戒備以防報復及行該道查勘兩處
功罪併地方有無隱匿重情容臣查明另行分
別具

題外緣係狡虜糾眾入犯官兵堵剿獲捷謹先報
聞事理為此具本專差舍人江梓齋捧謹具題
知奉

聖旨兵部知道

敘議各官功罪疏

題為狡虜兩次入犯各官功罪不同謹據實叅敘
懇乞

聖明分別賞罰以昭勸懲以重邊防事據慶陽府管
理寧夏理刑同知王三錫呈蒙臣憲牌仰本職
即便親詣中衛查勘入犯達賊的係某枝共有
若干原與某日時從某邊段進入直至某處官
兵曾否拒敵槍掠人畜并陣亡損傷軍丁的有
若干斬獲首級是否真正強壯應當作何陞賞
優恤及地方有無隱匿別情務要從實詳報遵

依查勘間又蒙憲牌仰本職即將虜犯廣武官軍堵敵獲功情由一併覈查明確詳報以憑具題施行該本職查勘得酋首銀定自本鎮續款之後向未入羈歹成初雖款市亦自萬曆三十三年犯鎮朔革賞以故數年以來東西窺伺大為各鎮之患本年十月初一日該中衛叅將賀世勳據巡邊夷人泮彥兒密說銀定自六月間親往河東吉囊處討兵回來同歹成約了七箇頭目要在沿邊并新疆槍掠因秋防俱有兵馬設備未得入犯今帶領精兵達子二千五六百見

住山後盪池不知犯槍何處等情塘報當蒙本部院申飭中衛等路將領收斂人畜探甲隄備如有入犯消息大加剿殺務期全勝鄰兵聞警不待調遣星馳策應隨發署奇兵營事坐營都司馬允登領兵五百員名駐廣武適中等處聽援初二日有見款酋首賓妻部下散夷播兒害賽令達住楊賣四名到中衛城下求開小市本營叅將賀世勳因非市期未允隨問銀歹消息各夷回說往清雙山去了本官信以為實不復偵探至初五日早晨四夷復至該營講說買賣

間隨有銀方二酋帶領達賊二千餘騎於本日午時分從本路地名煖泉兒口進邊該哨爪夜不收楊希道舉砲一箇瞭角軍夜張佑未即接傳及復放砲二箇方纔走報該營本衛因止距邊十里故虜衆突至城下一半堵擋西南二門一半撒馬鵬槍賀世勳與本營中軍官馬允祥方從東門統兵出城於西北角樓下屯劄各賊擁衆相持彼此敵戰本官督令軍丁用弓箭火器向前射打僅止斬獲虜首三顆奪獲達馬五匹鎮虜堡操守李時芳聞警收斂隨提兵追堵

行至壘路湖遇賊二十餘騎本官奮勇對敵斬強壯虜首一顆奪獲達馬一匹本日戌時各賊從原口出邊去訖賀世勳當將播兒害等四夷緝拏收監比時原發署奇兵營事坐營都司馬允登同廣武營遊擊江應詔各聞警統兵馳至棗園堡迤西據報賊已離境未得臨敵查得該營與鎮虜堡共斬獲虜首四顆達馬六匹被賊殺死夜不收一名施召的陣亡家丁黃大化等二三名中傷回營身故軍一名盧景重傷軍丁韓萬等七名輕傷李均兒等四名射死施召的等

官馬九匹射重回營倒死韓萬等官馬四匹殺
死軍餘馮阿三等六名被擄男婦內走回張千
保等九名實槍去部藍州等四十七名口王三
等馬六匹張松等牛一百二十八隻騾一頭驢
四十五頭羊一百七十隻職恐猶有隱情復出
牌曉諭許殘害居民不時首告仍行中衛經歷
鄒濂掌印指揮馮繼孝及管所地方等官田產
玉等逐門審查相同取具各官不扶甘結在卷
本月十五日該平虜叅將聶自新塘報據巡邊
夷人土卜賴密說銀定等酋在山後蒲草泉聚

結要在二三日內犯槍玉泉廣武一帶隨蒙本
部院會發鎮城各營精健官兵委令遊兵營遊
擊潘國振統赴沿山衝要玉泉等城堡防禦十
八日據鎮城東南角樓守瞭軍人張興稟報迤
南新渠舉放煙砲從石空寺堡傳來蕭總兵即
領本營并前後司官丁一千八百餘員名前去
策應又蒙本部院復遣標下中軍遊擊黃鈇隨
營監陣本日各賊見烽火預傳未敢入邊二十
日廣武遊擊江應詔差夜不收王名出邊探得
銀定等達賊約二千有餘在地名井溝口墩北

空清山水聚結苗頭犯槍本營大壩等處走報
都司馬允登同正兵營司中軍把總熊彥吉賈
隆等赴彼設伏二十一日午時分前賊由本口
入境煙砲接傳各兵即時馳拒賊見我兵截堵
一齊吶喊迎敵數陣當有鎮城遊擊潘國振帶
領官兵五百員名廣武遊擊江應詔玉泉遊擊
賀維禎各領官兵三百員名亦望烽馳至聯營
合戰就陣斬虜首二十三顆奪獲坐纛一杆賊
見我兵勇猛披靡奔走官兵乘勝追至邊外二
十餘里復鏖戰許久槍砲打死數多俱被拉去

又斬獲虜首六十顆欲要窮追深入時因天晚
恐有埋伏不便收兵進邊查得各營共斬虜首
八十三顆內正兵營六十四顆據通丁王卜利
認有首領恰首級一顆係銀定下好人別蓋恰
奇兵營七顆遊兵營六顆廣武營四顆玉泉營
二顆各營共奪獲達馬五十四匹內中傷回營
倒死一十匹夷器四百五十三件陣亡軍丁胡
谷才等四名重傷也克賴等一十四名輕傷把
他哈等七名射死李進元等官馬一十八匹以
上并中衛先斬虜首共八十七顆逐一查驗俱

係真正內願陞強壯二十九顆願賞強壯二十
九顆次壯一十一顆幼小一十八顆中間並無
買冒隱匿別情取具各該中軍把總等官甘結
在卷其前功級業蒙本部院驗明照例每名先
給小賞銀三兩梭一疋布一疋共銀二百六十
一兩梭布一百七十四疋并量賞獲功員役花
紅共銀八兩中段六疋下段一十疋梭布一十
四疋以示鼓舞訖及照前項斬獲首級除願陞
蕭台賴等二十九名顆內有小頭目恰一顆應
照例加陞外願賞五十八顆內強壯為首樊得
等二十九名顆次壯為首捨刺克探等一十一
名顆每名顆該銀五十兩共銀二千兩幼小辛
泮祝戶等一十八名顆每名顆該銀二十兩共
銀三百六十兩為從強次壯忽纏大等六十九
名每名該給賞銀二兩布二疋折銀四錢共銀
一百六十五兩六錢幼小打刺等一十八名每
名該量賞銀二兩共銀三十六兩陣亡除願陞
胡谷才等三名外願賞有父子孛芍等五名每
名該銀三十兩回營身故盧景一名該銀一十
五兩共銀一百六十五兩以上通共該銀二千

七百二十六兩六錢與前願陞員役應候具
題陞賞各陣亡軍丁八名每名該給棺木銀一兩
共銀八兩重傷軍丁二十一名每名該給湯藥
銀五錢共銀一十兩五錢輕傷軍丁一十一名
每名該給湯藥銀三錢共銀三兩三錢通共該
銀二十一兩八錢與獲功員役銀校段足應於
庫貯撫賞內動支其小賞因無夷畜變價銀兩
俱於椿朋銀內支給與射死操馬三十一匹行
令各該營庫照數開銷奪獲達馬照例三分入
官變價聽候小賞其餘七分并各夷器俱給原

獲軍丁充賞仍備細造冊聽按院覈勘等因并
敘議功罪官員詳由到臣案照先據中衛叅將
賀世勲偵報銀夕二酋東西會兵意圖穿塞臣
一面飛檄各將堅壁清野櫟甲以備一面會行
總兵官蕭如薰督同正遊二營聽援且慮中衛
僻在西南距鎮四百里恐一旦有警重兵必難
猝至隨先發署奇兵營事坐營都司馬允登領
兵駐廣武適中地方策應至十月初七日據賀
世勲塘報虜衆三千入犯本官對敵斬首四顆
奪獲達馬六匹陣亡并傷損軍丁一十五名射

死官馬一十三匹槍去男婦一十三名口馬牛
驢羊二百四十二匹頭隻等情臣即牌行河西
道并理刑同知王三錫查勘去後十五日據平
虜叅將聶自新塘報銀歹二酋自犯中衛之後
仍聚結邊外臣計此酋驟勝而驕勢必再逞隨
會發鎮城各營官兵分布設防十八日烽砲傳
來該總兵官蕭如薰統兵策應臣復遣官監督
二十二日據坐營都司馬允登等塘報獲功緣
由并稱二酋仍結兵未散該臣即時馬上傳諭
各該將領萬分戒備以防報復一面備行該道
覈查一面具本於二十三日報

聞訖續據各營呈解虜級奪獲達馬夷器并獲功員
役前來臣親詣教場同鎮臣查驗前後共斬虜
首八十七顆內強壯五十八顆次壯一十一顆
幼小一十八顆俱各真正照例先給小賞花紅
并量賞獲功各員役以示激勸外時帶管寧夏
河東河西靖邊道右布政使王愛偶報病故所
遺二道事務俱皆停滯尚無帶攝之人臣以事
關虜情難以緩待復催行同知王三錫覈勘冊
報去後今據回詳隨與賀世勳前報查對內比

梅夏奏請 卷五
今勘之數多報虜一千少報搶掠軍民三十餘
名頭畜一百餘隻被殺軍餘六名隱匿未報臣
不勝切齒痛恨蓋世勲習蒙蔽之故智掩失事
之重情而不知隱匿之罪反甚於踈虞臣益不
能為之解矣時督臣員缺臣請得而備言之查
得銀万二箇雖向屬本鎮而叛服不常屢為邊
患所從來遠矣銀定自二十九年續款通未入
市而反成則助之為虐介於順逆之間者也故
臣於前犯鎮朔

題革其賞乃復恃其桀驁滋為不道連年如犯涼

州未安等處皆彼為亂首臣屢與督臣責以大
義而執迷不悛反思謀我臣嘗日夜私計恨不
即滅此而後朝食故方謀得其情即行該路嚴
防不啻三令五申使能多方偵探以觀其疾徐
而為之備則我兵雖寡彼亦不至得利而去乃
徒徇夷言遂爾休殆致令乘機突入蹂躪近郊
本官雖城外對敵而一步不敢前尚可謂有將
官之氣乎以故虜志益驕旋復逞於廣武幸而
陳兵預待併力迎擊斬獲首功八十有奇奪獲
夷器四百有奇狂鋒大剄前耻足雪而將來之

窺伺或亦可少息矣然臣等之力不能及此實
皆我

皇上神武昭布

廟謨遐宣之所致也所據前項功罪廉勘已明若不
分別懲勸何以風厲人心除中衛掌印指揮馮
繼孝收保欠嚴該臣徑行戒飭革換併軍夜張
佑捆打發落外叅照寧夏中衛叅將賀世勳身
膺保障計乏綢繆戎馬在邊頓忽枕戈之備門
庭玩寇全無死綏之心報虜則飾少以為多盡
欲塗人耳目失事則視輕而掩重忍令蕩我邊

陲既隳軍實而長寇讎難追文網而辭踈縱本
營中軍副千戶馬允祥全軀念重臨事謀踈不
能賈勇以前驅但聞擁兵而自衛以上二官雖
獲有三級而得不償失難以贖罪俱應革任提
問分別正法者也至於獲功各官如鎮守寧夏
總兵官都督同知蕭如薰忠義疾風勁草韜鈴
紫塞長城鞠旅陳師指顧奪豺狼之魄臨敵決
策俄頃清雞鹿之塵駿烈孔昭燕然可勒此一
臣者相應優敘鎮城遊兵營遊擊潘國振廣武
營遊擊江應詔玉泉營遊擊賀維禎臣標下中

軍遊擊黃鈇署奇兵營事坐營都司馬允登正
兵營中軍原任守備熊彥吉心懷馬革志在狼
胥撥甲當鋒共殲方張之虜援枹鼓氣克成汛
掃之功以上各官俱應敘賚各營把總賈隆田
科謝起玉柄劉盈科姜道孟應熊毛克忠陳進
忠李時芳以上各官或作前茅而矢石不避或
當後勁而斬搴稱雄均應量加賞賚內賈隆等
七員俱有部功應照例陞級其餘哨司各官查
無俘馘者臣不敢以濫及也再照有順有逆乃
犬羊之異態順撫逆剿宜威惠之迭施今二酋
徼亂臣固不敢縱敵而各虜奉盟臣亦不敢多
事業已諭令黃婦等酋照舊住牧與之相安唯
是銀歹負固有年罪難貸貫既已肆其癩噬終
難馴其跳梁容臣遵照

明旨相機處置但有蠢動情形即行擣虛批亢庶乎
兇逆可除而款事不為其所撓敗矣至於各營
奪獲達馬應照例三分入官變價聽候小賞支
用其餘七分并夷器俱給原獲軍丁充賞獲功
願賞首級等項共該銀二千七百二十六兩六
錢應候速發查給其擒獲四夷既稱係款酋部

落似應待以不死今其歸我人畜然後貸罪釋
放或亦操縱款虜之一處也既經本官查明詳
報前來又該臣覆覈無異除將各營領兵把總
及獲功首從傷亡軍馬等項造冊咨送兵部以
備覈查外相應具

題伏乞

勅下該部覆議上

請合無將賀世勲革任與馬允祥俱行巡按御史提
問究罪並將廣武獲功將吏一併覈勘照例陞
賞及地方有無隱匿別情明白議擬徑自具

奏及照中衛極稱衝險又當夷情孔棘之日所遺
該路叅將員缺應於就近廉勇官內速為推補
其小賞花紅動過椿朋撫賞銀兩段布對陣射
死官馬各准照開銷緣係狡虜兩次入犯各官
功罪不同謹據實叅敘懇乞

聖明分別賞罰以昭勸懲以重邊防事理臣未敢擅
便為此具本專差承差袁陞齎捧謹題請

旨奉

聖旨兵部知道

報慶藩火災疏

題為火災異常燒燬

藩府宮藏事據

慶府長史司呈為火災異常府宮庫藏突被燒燬
懇乞

題賑以固邊藩事內稱本年正月十七日亥時本
府突然火起將寢宮庫藏並皆燒燬其中衣帛
器具等物一無所存變出非常極為慘苦請乞
具

題等情又據闔鎮宗儀倪燧李麟等各呈前事到

臣俱批行寧夏河西道查勘去後續據分守河西帶管本道右叅政高進孝呈稱行據寧夏理刑同知王三錫申查得

慶府分建本鎮三面鄰虜風土苦寒祿產原薄向者嗜劉為亂復遭搶劫當時

今王方纔六歲

慶先王妃方氏藏

王地窖自縊死節內外財產盡歸逆手至今物力匱乏猶且不支近正月初一日寅時

王將望

關朝

賀偶見火光如斗自南墜落乃於本月十七日夜二更時分陡然火起燃燒寢宮此時

王已睡熟幸而

天誘其衷忽即驚覺急取

冊寶從窻中走出風狂火烈救護難前遂將寢宮庫藏燒燬二十餘間歷來

頒賜諸物及一應器帛盡成煨燼又侍女被傷數人今已續死三口如此災變委屬異常查得萬曆三十二年

晉府被火曾經

題討遺祿并宗儀積剩銀兩修建奉

旨俞允三十六年

蜀府報災亦蒙

聖慈矜憫該藩事體正與相同而艱難苦楚過之似
應俯從輿情

題加賑恤等因到道看得

慶藩自向罹多變府事久已衰薄及

王承襲以來亦尚摧殘未復澹泊謹守有同寒素
不謂天復降災倏焉被火宮寢頓作土墟帑藏

俱成灰燼非但日用金帛毫無所存即從來珍
收諸器悉歸烏有

親王那堪此厄實為地方一異災也合無照例具
題亟議優恤備詳到臣時督臣未任該臣會同巡
按陝西監察御史楊一桂看得

慶藩分封巖塞當西北極邊之地風土寒苦已非
腹裏可比壬辰時劉肆逆橫遭逼劫彼時

王躬甫在襁褓瑩瑩兼失怙恃遘難既多遂爾衰
替今年齡漸長貴而能貧唯是元氣未復而蕭
條尚如故也乃今復罹回祿既焚其寢室又延

及庫藏雖稍遠房廊幸有救免而彝器典策則
蕩然無復存矣夫災變之來何地蔑有而見於
藩府摧殘之後其情亦良苦也臣等待罪地方何
忍嘿嘿既經該道查有

二藩火災事例詳報前來相應具

題伏乞

聖慈特加軫恤

勅下禮部查例覆

請施行緣係火災異常燒燬

藩府宮藏事理臣等未敢擅便為此具本專差承

差張祿齋捧謹題請

旨奉

聖旨禮部知道

方面九年考滿疏

題為藩臣九年給由遵例考覈亟

請陞擢以酬勞績以示風勵事准巡撫陝西等處地方
贊理軍務兵部右侍郎兼都察院右僉都御史顧其志會
稿據陝西布政司呈准本司左布政使王民順咨稱本職年
六十一歲江西撫州府金谿縣人由進士隆慶五年六月內
除授廣東肇慶府廣寧縣知縣調繁本府新興縣知縣行取
選授湖廣道監察御史差按蘇松常鎮陞山東按察司僉事
丁父憂復補廣東按察司僉

事陞本省布政司右叅議以軍功

欽賞銀幣二次陞本省按察司副使陞福建布政司右叅政丁母憂復補廣東布政司右叅政陞本省按察使陞陝西布政司右布政使萬曆二十八年六月二十九日到任三十年七月內以原任叅政軍功

欽賞銀十五兩陞俸一級三十一年三月十五日陞授今職本年四月初八日到任和至本年伍月二十八日止以左右布政使通歷三年任滿呈詳總督撫按各部院會

題吏部覆奉

欽依復職又自三十一年五月二十九日起至三十四年四月二十八日止通前實歷俸六年任滿呈詳總督撫按各部院會

題吏部覆奉

欽依復職又自本年四月二十九日起至三十七年三月二十八日止通前連閏實歷俸一百八箇月九年任滿例應給由任內節蒙薦舉三次經管一應錢糧俱已支放交盤明白並無粘帶不了及未完事件合咨前去煩為轉呈施行等因

事陞本省布政司右叅議以軍功

欽賞銀幣二次陞本省按察司副使陞福建布政司右叅政丁母憂復補廣東布政司右叅政陞本省按察使陞陝西布政司右布政使萬曆二十八年六月二十九日到任三十年七月內以原任叅政軍功

欽賞銀十五兩陞俸一級三十一年三月十五日陞授今職本年四月初八日到任卅至本年伍月二十八日止以左右布政使通歷三年任滿呈詳總督撫按各部院會

題吏部覆奉

欽依復職又自三十一年五月二十九日起至三十四年四月二十八日止通前實歷俸六年任滿呈詳總督撫按各部院會

題吏部覆奉

欽依復職又自本年四月二十九日起至三十七年三月二十八日止通前連閏實歷俸一百八箇月九年任滿例應給由任內節蒙薦舉三次經管一應錢糧俱已支放交盤明白並無粘帶不了及未完事件合咨前去煩為轉呈施行等因

通詳到臣查得

會典內開一款在外大小文職若九年已滿託故在任久住不行赴部及不申缺者叅問放回閑住又一款外官給由歷俸一百八箇月准九年考滿若多歷少歷者俱叅問少歷一月以上者問罪補任未及一月者若任內錢糧等項完結亦照例問罪免其補任如有未完事件須回任完結方許給由又一款司府官員九年考滿到部考覈繁稱無過陞二級有過并簡而稱職無過陞一級等因俱遵依外今據前因會稿到臣該

臣會同巡撫陝西等處地方贊理軍務兵部右侍郎兼都察院右僉都御史顧其志提督軍務兼撫治鄖陽等處地方都察院右副都御史黃紀賢巡撫延綏等處地方贊理軍務都察院右副都御史涂宗濬巡撫甘肅等處地方贊理軍務都察院右副都御史周盤巡按陝西監察御史楊一桂侯執蒲議照陝西布政司左布政使王民順才鉅作用自別資深勛名彌隆頻荷廷推允宜節鎮稱職茲當九年給由考覈無礙准令照例起送赴部外相應具

題伏乞

勅下吏部將左布政使王民順照例考覈施行再照全陝素稱繁劇時復多故本官經營拮据勞績最懋况方面官二品三考向所未覩節鎮卿寺之推不翅十數以此知公論之素孚本官心懷止足力求退休移疾呈請者數矣臣等為地方挽留荏苒遂及九載不有

特簡曷勵賢勞合無遇有相應員缺早為推補上請亟

賜點用庶人材不致終弃而士氣益知振奮矣緣係藩臣九年給由遵例考覈亟

請陞擢以酬勞績以示風勵事理臣等未敢擅便為此具本專差承差陳用齋捧謹題請

旨奉

聖旨吏部知道

甄別練兵官員疏

題為甄別練兵官員以昭勸懲以勵人心事准總督陝西三邊軍務兼理糧餉兵部左侍郎兼都察院右僉都御史顧其志會稿案照先准兵部咨前事該本部題內稱延寧甘固各督撫衙門於年終甄別疏內將本鎮額定實在主客官兵及馬羸軍火器械有無增損召補果否修舉廢弛俱照遼東甄別練兵疏例開註以議功罪定賞罰又准該部咨為分布防秋兵馬以禦虜患以奠衝疆事本部覆議移文各該督撫嚴督大

小文武將吏相機戰守秋防畢日查果信地無失應援有功破格優薦陞賞若或自分彼此逗遛觀望貪功僨事督臣即照欽奉

聖書查其失事輕重總兵題叅究治副叅以下按法重處等因俱題奉

欽依遵行在卷今照萬曆二十六年秋畢歲終所據防練大小各官行准該鎮撫臣開報到臣例應會

題等因會稿到臣該臣查得邊鎮事例監司將領俱當於年終甄別本鎮兩道併缺而帶防在事者又偶值物故難以循例具疏除練兵文冊咨送督臣類送兵部查考及任淺勞未卓樹過細尚堪策勵者臣等徑行獎戒中衛失事叅將賀世勲臣已先疏叅革俱不敢瑣瀆

聖聽所有應薦應刺各官謹會同總督陝西二邊軍務兼理糧餉兵部左侍郎兼都察院右僉都御史顧其志為我

皇上陳之如協守寧夏副總兵凌應登猷略克兼文武豪雄獨擅干城績著北門久知名於戎狄英蜚西夏已增險於金湯緣履任未久不敢槩敘

外查得協守東路花馬池副總兵石尚文七尺
雄軀六韜偉略推心撫士推牛惠洽師中厲氣
防胡牧馬塵清塞外靈州營叅將吳繼祖保障
身當鐵壁網繆險峙金墉八面雄才一腔義膽
平虜營叅將聶自新英發風標揮霍才刃解推
人樂為用修扞虜不敢侵鎮城遊擊潘國振坐
甲防胡投醪結士勇敢桓桓飛將操修表表清
流臣標下管中軍事遊擊黃鈇力堪扛鼎拔山
誠可貫金鑄石箕裘不忝韜略稱奇廣武營遊
擊江應詔砥節終能如始練兵勇且知方績懋

邊垣望隆將閩洪廣營遊擊文應奎襄革雄心
犁庭勁氣馭黠虜潛消窺伺當險塞備見綢繆
屯田水利遊擊趙維翰以勞動事有志吞胡掃
除積蠹一清疏瀹諸渠永賴玉泉營遊擊賀維
禎年資英茂膽力沉雄簡蒐足壯軍容張弛能
操戎索興武營遊擊丁繼祖偉岸丰標老成幹
局固圍四郊靖壘枕戈無日忘胡坐營都司馬
允登望之如挺山嶽恢乎不鈍鋒芒借箸雄謨
建苑偉器安定堡守備郭維校藝精貫蠹才捷
剗犀修防時塵衣袂撫恤真同醪續撫夷守備

張曙聳身壑雄姿懸河辯口制款戎輸五利折衝
邊藉長籌以上諸臣修防訓練克效勤勞俱應
薦揚以備擢用內吳繼祖資俸最深譽績尤懋
相應加銜久任以竟才猷者也又訪得大壩堡
守備施大顯志懈年衰時唯縈情利藪日玩月
愒略不著意邊防一占種民田三頃撥軍耕種
仍斂闔堡糞土五百餘車張付等證一包占匠
役戴邦誠等三十餘名製造鞍轡納紗等物全
不應差王保等證一私役軍丁採打湖草三萬
餘束運送草場代納無馬軍草一百餘分每分

扣糧銀二錢張道等證一隱冒逃故軍人楊英
等三十餘名每月糧銀扣留入己識字殷榮等
證一小市不遵原限私與夷人交易歲換馬牛
羊隻數百每致乘機生事騷擾地方敖刺氣等
證一向所屬蔣鼎等堡每堡發銀一兩要糯米
一石鵝鴨十隻又銀五錢要草十車各堡照數
交送仍將原價封還夜役陶升保證一指稱年
節索要軍丁禮銀每十二月正月各扣銀一錢
姜法等證一漢壩堡官周成武包姦樂婦楊女
兒本官訪知挾要銀十兩莊貴等證一派餘丁

車牛運輓二十餘車赴家私用致傷耕牛三隻
飲恨不敢聲言朱欒等證一指稱衙門器具向
所屬七堡每堡要榆木二車製造圍屏等物運
送私家管隊張通等證一堡屬邊墩五十餘座
每月每墩索要網子三頂乾柴十束各役供應
不暇常失瞭望墩軍周青等證一縱子包占樂
婦楊住兒往來行走因而綽攬民草沈萬良等
證此一臣者以官為市已覺豁豁之難填無事
不隳那堪營伍之再壞相應革任回衛以警官
邪者也伏乞

勅下兵部再加查議如果臣等甄別不謬將石尚文
等循資擢用吳繼祖量加副總兵職銜照舊管
事施大顯革任回衛差操所遺員缺另行推補
庶法有勸懲人知奮勵而於邊防將重有裨益
矣緣係甄別練兵官員以昭勸懲以勵人心事
理臣等未敢擅便為此具本專差承差陳完齋
捧謹題請

旨奉

聖旨兵部知道

年終議薦將材疏

題為議薦將材以備擢用事案照先准兵部咨該
本部具題各邊缺多人少合候

命下移咨各督撫衙門會行巡按御史各將所屬衛
所指揮鎮撫千百戶及各營路中軍千把總等
官加意諏訪如果年力精強才猷諳練謀勇兼
長緩急可恃者即於年終酌量奏薦逐名註考
要見某某宜於衝邊某某宜於次衝某某堪任
大將某某堪任偏裨另為一疏惟其人無拘名
數貴乎精勿當冒濫等因題奉

聖旨是各衛所武官材勇堪任的著督撫等官博訪
精核從公奏薦與武舉相兼備用不許冒濫欽此
欽遵備咨前來又准總督軍門咨同前事准此
俱經通行欽遵訖今照三十六年已終又備行
該道博訪開報到臣臣覆逐加詳核所有得於
聞見之真可備將材之選者謹會同總督陝西
三邊軍務兼理糧餉兵部左侍郎兼都察院右
僉都御史顧其志巡按陝西監察御史楊一桂
為我

皇上陳之查得標下前司把總中屯衛指揮同知金
汝卿抱略滿腔匣裏之龍泉欲吼從征萬里刀
頭之鯨血猶腥河西道中軍右屯衛指揮僉事
沈勳壯志泥封函谷雄風劔指樓蘭塞徼長城
將林噉矢河東道中軍靈州所指揮僉事孟崇
禮磊落才猷圓融機智叱咤風生劔戟指揮氣
奪欃槍原任守備大同玉林衛副千戶辛志德
忠肝義膽妙略雄謀築四臺三載經營增重險
百年保障正兵營千總寧夏衛指揮僉事勉忠
昂若干里之駒勇則百夫之特惠洽虎旅威振
龍荒靈州營中軍靈州所正千戶王承恩氣采

英明風猷凝遠鼓舞三軍雷動繕修百堵星聯
正兵營中軍原任守備寧夏衛前所鎮撫熊彥
吉貌類虎頭鬚藏豹略制勝中權能運策勲外
閩堪期奇兵營中軍左屯衛正千戶姜道目空
群馬氣卷長虹操弧百中應弦料敵萬全在握
左屯衛掌印寧夏衛指揮同知呂應兆唾手武
闡蟠芻將略志耻冒詢干進才堪屏翰輸猷鎮
北堡操守寧夏衛武舉官石賢燿穎雄才穿楊
妙技射策早閑三略練兵能用六花寧夏衛掌
印前衛指揮僉事汪濟民心無蹊徑才類干將

輕緩雅有儒風澹泊渾同寒士遊兵營千總寧
夏衛實授百戶王養廉瑤珉德器金石純心常
期掃穴犁庭可許搏風奮翮標下聽用西安左
衛武舉所鎮撫張國勲志在請纓繫虜文能草
檄籌邊矯矯干城翩翩跗注靈州營把總靈州
所試百戶李枝芳生有俠骨少稟剛腸才名已
擅專城志慮不營三窟靈州營把總大沙井通
運所實授百戶張大綬運甓勤勞標銅志向潔
守纖塵盡滌雄心百折難撓毛卜刺堡操守靈
州所副千戶陳誥雄如脫兔捷若承蜩沉機堪

借前籌疾足允稱上駟以上諸臣在金汝卿沈
勲孟崇禮辛志德勉忠王承恩熊彥吉姜道宜
於衝邊在呂應兆石賢汪濟民王養廉張國勲
李枝芳張大綬陳誥宜於次衝俱應隨才器使
以究厥施者也至大將偏裨則臣等未敢預擬
又查得原任遊擊寧夏後衛指揮僉事石棟富
韜鈴聲寒虜幕平叛逆義在劔端英雄未可投
閑鎖鑰終期靖塞此一臣者敢戰知名夙閑忠
義而又在困衡人惜其才相應併薦以備起用
者也伏乞

勅下兵部再加查訪如果臣等所舉不謬將金汝卿
等及石棟酌量推用庶緩急可濟而邊陲有攸
賴矣緣係議薦將材以備擢用事理臣等未敢
擅便為此具本專差承差陳完齋捧謹題請

旨奉

聖旨兵部知道

報小池撈鹽分數疏

題為邊鎮存饑議處備荒事宜懇乞

聖明俯賜採納以保重地以弭後艱事准總督陝西
三邊軍務兼理糧餉兵部左侍郎兼都察院右
僉都御史顧其志會稿准巡撫寧夏兵部右侍
郎黃嘉善咨據寧夏河東道右叅政秦尚明呈
據委官寧夏理刑同知王三錫呈稱親詣小鹽
池查得每歲額鹽二十萬石萬曆三十六年分
撈過鹽二十萬三千五百三十六石已經報完
堆積聽掣間節被風雨於內消折五萬九千一

百石外止實掣過并見在鹽共一十四萬四千四百三十六石數由到道覆查該年撈鹽溢額乃被消折五萬之上經管員役安辭其咎問擬大使王繪與該吏壩夫俱安置不如法各徒杖罪名另行通詳發落外轉報到職看得撈完前鹽其消折之外計數止足七分所據管鹽各官除靖邊兵備帶管寧夏河東道右布政使王愛物故府同知張名坤丁憂回籍州同知王國縉劣陞

王官俱無容別議外大使王繪例應戒飭等因到臣卷查先准戶部咨該前督臣部光先題本部覆議每年終會同延寧貳鎮巡撫將二池額課查其完欠分數叅治該道亦視此鹽法修廢舉刺又准該部咨亦該前督臣部光先等題本部覆議每年小池額鹽二十六萬四千八百四十一石大池額鹽二十萬九千八百五十六石務要撈曬如數以克邊餉如再分數不及該督撫及巡鹽御史照例查叅又准該部咨該前督臣葉夢熊會題本部覆議將大池額鹽減去五萬二千四百六十四石尚存一十五萬七千三百九

十二石為額小池額鹽減去六萬四千八百四十石尚存二十萬石為額以後管鹽官全完薦楊陞權九分八分分別獎勵七分六分獎戒並免五分重加戒飭不及五分與四分以下者罷斥又准該部咨該前督臣徐三畏等會題本部覆議大小鹽池各增井一百眼壩夫一百名年終查叅照依今例全完者薦楊陞權九分以上者獎勵八分者獎戒俱免七分者戒飭六分以下者革職等因俱題奉

欽依備咨前來通行遵依去後今准前因會稿到臣

除右布政使王愛病故府同知張名坤丁憂州同知王國縉劣轉俱免議外該臣會同總督陝西三邊軍務兼理糧餉兵部左侍郎兼都察院右僉都御史顧其志巡按山西等處監察御史陳于廷議照小池鹽課悉供寧固二鎮軍餉即今倉庾匱乏正宜加意採辦以裕

國計茲據查報止足七分所有經管官員各自難逭如鹽課司大使王繪職司鹽務調停無法鹽石消折虧額軍儲何繇接濟雖經究罪仍應照例戒飭伏乞

勅下戶部再加查議合無行臣等將王繪戒飭其消
折鹽石仍責令接管鹽務州同知陳萬言併大
使王繪督同壩夫撈採務足原數以後積鹽尤
宜周防若敢似前消化虧損定依法重處緣係
邊鎮存饑議處備荒事宜懇乞

聖明俯賜採納以保重地以弭後艱事理臣等未敢
擅便為此具本專差承差田文俊齎捧謹題請
旨奉

聖旨戶部知道

虜犯石空查叅失事將領疏

題為狡虜修怨入犯劣弁怠事疎防謹據實查叅
乞

勅嚴勦以肅邊紀事據寧夏河東帶管河西兵糧道
右叅政秦尚明呈蒙臣憲牌仰道即查石空寺
堡地方入犯達賊原係某枝的有若干進境馳
至某處該段哨爪軍夜曾否即傳烽火各該官
兵曾否遇賊堵敵於某時方纔出邊搶去人口
頭畜各若干傷亡軍丁各若干并地方有無隱
匿別項重情逐一查勘明確作速詳報毋得扶

同容隱未便又蒙總督軍門閱視茶院憲牌亦同前事俱行本道依蒙行據帶管西路鎮城監收同知駱任重呈查得本年六月二十一日有石空寺堡邊外潛住銀定歹成部落達賊三百餘騎覘知守備韓體仁赴邊兵馬出堡隨於本日辰時分從本堡枒楂山墩西北撒馬由大寺墩東空邊口入境比時墩軍王世爵劉二夜不收沈別子楊希道各失瞭望俱未即傳烽火提墩管隊張淮亦不行巡視以致各虜從柳條渠橋闖入撲槍大寺灣地方人畜至午時分本官方纔聞警回兵追堵間有西路叅將李崇榮亦隨提兵前來接應對敵數合賊見兵馬衆多隨於本日酉時復從原口出邊去訖今查陣亡石空寺堡軍丁四名王朝奉楊俊趙士賢閔加才西路營內丁一名牛大輕傷軍丁七名張伏四汪住兒平圪劉刺兒周七哇呀羅王大志殺死餘丁黃石妻一口槍去民餘徐桂徐松等男婦八十二名口行路不知名一人又王舉官騾一頭劉刺兒等官馬五匹民餘何禮羅恩等牛羊驢騾一百一十頭隻燒燬張思恭豌豆三車小

麥一堆該本職逐一查審俱各是實併將各該人犯呈解到道覆審無異為照虜情動靜全資哨探申嚴烽燧不啻諄切乃守備韓體仁把總楊衡漫不戒嚴軍夜王世爵等坐失瞭望以致賊虜乘隙入境搶掠數多不行實報罪俱難逭除失事軍夜聽叅

題至日具招其被虜人畜花名各數見今造冊候按院覈勘及將韓體仁等議叅詳報前來臣恐尚有隱匿復駁行該道再加嚴勘續據呈稱復行本官細查委止搶掠前數中間並無扶隱別

情具由覆報到臣案照先據韓體仁塘報稱六月二十一日辰時虜衆入犯斫死軍丁二名損傷軍丁六名槍去官馬二匹民餘男婦七名口牛羊驢騾一十三頭隻等情又據西路叅將李崇榮塘報相同臣以該堡距邊咫尺且時當耕耨虜既擁衆突入所掠必不止此隨牌行該道嚴查務期實報去後今據前因該臣會同總督陝西三邊軍務兼理糧餉都察院右都御史兼兵部右侍郎顧其志看得石空寺堡當勝金關之東逼鄰虜數最稱險要向自銀万被創其部

落在山後者無日不耿耿思逞臣等申飭戒備
 不啻再四使能嚴明烽燧早為收保使能入而
 不能掠又使聞警之後速扼橋梁斷其一線之
 路使能掠而不能歸則虜雖驚悍殲之亦易乃
 韓體仁等始不設備既復畏敵束手觀望怯不
 敢前直待李崇榮兵至而後合營追擊然虜已
 得利而出矣一級未獲猶復侈言截堵且併搶
 掠之數而隱匿焉是尚知有三尺法乎參照石
 空寺堡守備韓體仁職司專城才疎禦侮隄防
 無術致犬豕得以縱橫截剿後時俾人畜竟遭

鹵掠而况隱多報少良心已漸滅無餘兼且嗜
 利剝軍穢狀更彰聞有據誰階之厲難逭厥辜
 本堡把總寧夏衛試百戶楊衡闕茸無為選悞
 不振虜來失禦既戶牖之疎防敵任狂張敢弁
 髦乎職守此二臣者俱應革任提問分別治罪
 者也西路營參將李崇榮身屬路將責固難辭
 但聞警遠能馳至臨敵復敢前驅虜之不能深
 入者實得其力且到任未久情稍可原此一臣
 者似應免議該道右叅政秦尚明代庖隔遠勢
 難周顧虜犯突出於倏忽查覈能發其奸欺此

一臣者應照近例原免伏乞

勅下兵部再加查訪合無將韓體仁楊衡先行革任俱行巡按御史提問正法秦尚明等免議仍查地方有無隱匿別項重情聽其徑自具

奏施行其石空寺堡所遺守備員缺速行推補緣係狡虜修怨入犯劣弁怠事疎防謹據實查參乞

勅嚴勘以肅邊紀事理臣等未敢擅便為此具本專差承差賈住齎捧謹題請

旨奉

聖旨兵部知道

調補副將疏

題為秋防正急副將缺官乞

賜就近調補以重邊備事該臣看得副總兵一官關係原重蓋以協同大將有提攝各路之責杆衛衝疆藉助勦一臂之力殆不可以一日缺人焉者本鎮副總兵凌應登調補

京營提督巡捕業已奉有

俞旨矣臣愚為地方計慮方擬以靈州營管叅將事副總兵吳繼祖

請補偶接邸報見陝西撫臣于若瀛一本為秋防伊

邇邊報孔棘等事題將本官陞補洮岷夫在彼
在此均屬重地臣亦何敢異視第其具

題在凌應登未調之前尚不知本鎮缺官故權宜
於緩急者如此耳今秋風正高虜易蠢動狡酋
如銀定者又屢報近邊思欲逞志於我不可謂
非多事之時也且沿邊一帶無處不衝而往來
調度又一切於副將是賴不可謂為不急之官
也所據前項員缺似應亟補第恐借才別鎮未
免時日之或淹若即就近擇人庶得緩急之有
濟臣竊謂吳繼祖可調補也蓋本官數載靈武

勞績最著發劓之刃既已試於衝城熟路之車
又何難於重鎮况橫城馬頭見在修築秦壩石
閘又正查議本官未畢之前功若仍令料理以
終成之亦永利也頃臣於年終甄別議加銜久
任者亦正為地方計耳今副將急缺而本官尤
最相宜臣何敢默默而處於此謹會同總督陝
西三邊軍務兼理糧餉都察院右都御史兼兵
部右侍郎顧其志議照靈州營管叅將事副總
兵吳繼祖百鍊雄才萬全偉略竭心思而繕塞
險增一路金湯誓新膽以防胡安貽四民衽席

久負干城之望足當疆場之衝相應改補本鎮以盡其長者也伏乞

勅下兵部再加查議如果臣等所言不謬將吳繼祖以原官調補鎮城協守副總兵所遺靈州營參將員缺另行推補庶衝邊得人而地方有攸賴矣緣係秋防正急副將缺官乞

賜就近調補以重邊備事理臣等未敢擅便為此具本專差承差張祿齋捧謹題請

旨奉

聖旨兵部知道

請補該道疏

題為新補兵道聞言未任懇

賜亟補以重邊備事該臣查得本鎮河西兵糧道員缺自按察使高世芳丁憂之後今已三年久矣彼時先以武選司郎中朱化字推補久未得

請及改推山西叅政李茂春又為彼中借留而朱化孚之補前缺則始於去冬得之者也臣接見邸報隨牌行該道催趣近據本官呈稱遵依前來行至中途偶聞前任被論義難趨赴且復兼身病除職徑疏控

陳外請乞具

題等因到臣臣謂本官既有前疏則或來或止當必獲

命而後決而今猶未也衝鎮監司虛而無官臣得不以此為兢兢乎謹會同總督陝西三邊軍務兼理糧餉都察院右都御史兼兵部右侍郎顧其志巡按陝西監察御史楊一桂議照本鎮孤懸河外最稱衝險向止以兩道分轄責任原重凡所為詰戎儲餉固國防胡一切征繕之事何者不賴該道而河西今日尤屬喫緊乃朱化字方

補又復以掛議辭任逡巡道路之中雖其疏未批發而缺已久懸難再虛待况今銀首猖獗我是用急又當多事需人之會乎所據前缺相應

題補伏乞

勅下吏部速於就近相應官內推補一員責令剋期任事其朱化字另候部覆庶邊務克濟而重地有攸賴矣緣係新補兵道聞言未任懇

賜亟補以重邊備事理臣等未敢擅便為此具本專差承差徐完齋捧謹題請

旨奉

聖旨吏部知道

撫夏奏議卷之五終

